

# O LE SULU SAMOA



EKALESIA FAAPOTOPOTOGA KERISIANO SAMOA  
O LE NUSIPEPA FAA-LE-LOTU NA FAAVAEINA I LE T.A. 1839



**FAAVAEINA 1839 O LE SULU SAMOA SETEMA 2022**

email: [sulusamoa@cccs.org.ws](mailto:sulusamoa@cccs.org.ws) - Main Office: Ph. 24414, Ext 30 - website: [www.cccs.org.ws](http://www.cccs.org.ws)

**UA OUTOU SEU UA LAGATILA, UA OUTOU FAAPULOU  
LE TUALIMA, UA OUTOU MALO FAI O LE FAIVA!**



***Susuga Ioane Viliamu Samoa FT & Vaita'i***



***Susuga Siolo Saufatu Tauati FT & Merita***



***Susuga Matapoo Peniamina FT & Penina***



***Susuga Leuma Faletese FS & Salomina***

# **FAASINO UPU**

1. O LE LAUGA	2
2. FONOTELE 2022	4
3. A'OA'O FAAU'U FS, 2022	5
4. AU PENISIONE 2022	7
5. O LE PEROFETA MULIMULI	8
6. LOTU AU LEOLEO FONOTELE	11
7. O LE ALII I LONA NOFOA	13
8. O E UA FAI I LAGI FOLAUGA	14
9. ATA O MATAUPU TUSIA	16

## **O LE LAUGA**

Tusi Faitau: Mareko 10:41 – 45

Matua: <sup>40</sup>*A o le nofo i lo'u itu taumatau ma lo'u itu tauagavale, e lē o ia te au lea ona avatu, a e tau lava mo e ua saunia mo i latou lea mea.* <sup>43</sup>*a o sē fia sili ia te outou, ia fai o ia ma a outou auauna;* <sup>44</sup>*o se fia muamua foi ia te outou, ia fai o ia ma tautua a outou uma.*”

Manatu Autu: **O LE MAMANU**

O le mamanu, o le ata po o ni ata ua vaneina, pe ua taina ma ua pipii, e lē mafai ona toe aveesea; e pei o le pe'a a le alii ma le malu a le tamaitai Samoa. E oti lava le tagata e lē toe aveesea mai lona tino. E i ai foi ata ma faatusa o mea e mafai ona vali ma tusi, e pei o ata o Iesu ma mamoe, e pei o le ata o le Talisuaga mulimuli a le Alii ma ona soo, e fai ma mamanu e manatua, tausi, ma faamanatu e le au faatuatua, le uiga o ia mea mo le faatuatua a o aga'i i le lumana'i.

Tatou te malamalama lelei lava i le a'oa'oga lea a Iesu, o le tagata tautua, ma le tagata auauna. Auā o le a'oa'oga faa Samoa, o le ala i le pule o le tautua. E le mafai ona e pale i le pule e aunoa ma le tautua matavela, tautua toto, tautua nofo tuavae. E ui ua lamatia foi lea faiga e suiga o nei aso. A e lē suia le tāua o le moni ma le faamaoni o lea faiga ma le moni o upu a le atunuu.

O le valaau a Iesu mo ona soo, ina ia fai i latou ma fai faiva i tagata. Ina ia fai ma faataitaiga lelei o le tagata tala'i, o le fa'aauauina lea o le finagalo o le

Alii, ina ia molimau, auā o le malosi e maua mai Lē ana le feau ua valaauina ai.

O lea ua sauni Iesu ma ona soo e faatū le malaga i Ierusalem. Ma ua tapena foi e le Alii le au soo ma toe tima'i ina ia sauniuni o lea o le a amata ona tatala faitotoa, o mea faigata o le a oo mai. Ma ia amata ona faaloloto tele le onosai ma le faatuatua, auā e faigata ma tiga le ala. O mamanu o le ala i le palealii e feto'ai lava ma mea faigata, o puapuaga, faafitauli ogaoga e oo lava i le oti.

A o le a'oa'oga lea e faalē tatagi lelei i taliga o le au soo. Auā o le vaega lea o loo i ai le faitauga o le asō, o loo iloa ai e pei o le vāvāmamao o sasa'e ma sisifo, le mea o talanoa ai Iesu, ma le mea lea e mafaufau i ai le au soo. Auā o le mamanu o loo talanoa i ai Iesu, i tiga ma faigata o loo faatalitali mai i Ierusalem, a o le au soo o loo mafaufau i le lalolagi, ma ona mamanu a leaga e fia oo i ai. O le fia mamalu, o le fia fai ma sili, o le fia pule, momo'o i le malosi ma le paoa, o le tamaoiga, ma isi lava mana'oga e saili i ai ia faataunuu.

### **1. O le mamanu a le tagata.**

Ua iloa lava le ala na mana'o ai le tagata ina ua faalata e le gata, o le fia fai ma atua. Tiga ona tafili saunoa ma ola fiafia i le faatoaga i Etena, a e na tasi lava le faalogo i le mafuaaga e ala ai ona lē mana'o le Atua ina ia pa'i i le laau, ona e pei ai i laua o ni atua, galo loa le faatonuga a le Atua. Ua fia atua, o le ala lea na pa'ū leiloa, ma fai mona tofi le malaia.

A o le aga lea e lē o mafai ona tuua, o le manatu o tagata o latou o atua, e ese mamao le mea na a'oa'o ai le Keriso, ma le manaoga o le fia atua. A ua tatou iloa i le tala faasolopito o le lalolagi, ma le Ekalesia, tiga ma faigata na tutupu ma aliali e mafua mai ona o tagata fia atua, ma o latou manaoga ina ia 'auna nei i ai se tasi e faalavelave ma tu mai e faasalavei le ala o mana'o.

O mea na tutupu ai le tele o taua o le lalolagi, ona o tagata faapena. E oo lava foi i le Ekalesia ina ua manatu e fai ma ta'ita'i o le lotu, e lana foi pule e faia, pe sa'o pe sesē, e faia lava. O le ala na mafua ai ona manatu nisi, e ao ina toe faafoi le Ekalesia i le mea na fai mai ai le Tusi Paia, ma le faasinoga a Iesu. Ma o le ala lea o le tele o lotu i le lalolagi, ona o le manatu o nisi, ua faalelalolagi tele mea o loo faia

## **2. O LE SULU SAMOA SETEMA 2022**

---

i totonu o le Ekalesia, a ua tuu le mea na mamanu e le Alii o Iesu Keriso, a e fai le mamanu a le tagata. Le Ekalesia ma le au faatuatua, sei toe vaavaai i le mamanu a le tagata, e oo ai i mea faigata, auā e foliga faigofie le ala e faataunuu ai, a e o loo taoto mai i le ala mea e sili ona faigata, e lei oo muamua i ai, e oo lava foi i le Ekalesia. O le feau mo le Ekalesia, ina ia toe silasila i le mamanu a le tagata, o le fia sili, fia pule, fia fai ma alii ta'i, mana'o, matape'ape'a ma le faaloloto.

Ia manatua le tala faasolopito o le lalolagi ma masaesae matagā sa feiloai ma tagata ona o le mamanu lea, o le fia sili. A e ia manatua foi e lei alu ese ai foi le lotu i lona tala faasolopito, na fai ma ala e masofasofa ai le Ekalesia.

O le feau faamanatu o le Tala Lelei mo tatou uma, sei toe silasila o le mamanu a le tagata sa tele lava ina tutupu ai mea faigata, sa faafesagai ma le lalolagi, ona o tagata fia atua. A e na faapea foi le tala o le Ekalesia a le Alii i lona foi faamaumauga ona o ta'ita'i lotu fia atua, ma latou fao le mamalu o le Atua, na fai ma ala o le tele o fe'ese'esea'iga i le tala faasolopito o le Tala Lelei a Keriso. O le mamanu lava ia a le tagata, o le fia fai ma atua, o le ala na toilalo ai le lalolagi ma mea na faia.

## **2. O le mamanu a Keriso.**

O lea lava ua taoto le ala i Ierusalem e tusa ma le faamoemoe o le Alii, o le alu e maluu ai. O le ala lea e le'i mate'ia e le au soo, auā na manatu, o le malo o le Alii o le faatuina, e pei o malo o le lalolagi. Pe o le ala lea na lagatila ai le mana'o o le au uso lea ona o le manatu a oo ina faatūina le malo lea ua ta'ua e Iesu, ia maua ni o la tofi lelei, a e o le manatu uma lava lea o le au soo, o le ala na lē fiafia ai. Aua fetalai Iesu, e leai se mea faapea e tupu, auā o le Atua e pule i le mea lena.

A ua ia tautino le mamanu o le malo o le Atua, o lē fia sili ia fai ma auauna, o lē fia muamua ia fai ma tagata tautua. Aua le manatu faapei o nuu ese, o e ua sili, ua pule i latou. O le mamanu lea a le Alii o Iesu Keriso ua tuuina mai e fofō ai le faafitauli o le fia sili, a ia ola faa-auauna, ia ola tautua, ma ola alofa i si tagata, ma le Ekalesia a Keriso faapei ona Ia poloai mai e fai.

Soia le faamoemoe i le pule ma le malosi faale tagata auā o loo manino le feau a le Alii. Tautua ma auauna, o le ala lea o malo ma mamalu e maua ona o a'oa'oga faa Iesu. O le mamanu e faavae i le alofa faale Atua, ina ia fai ma auauna e alofa faamaoni i le Ekalesia a Keriso. E ofoina le ola mo ana feau, ma faia ma le faamaoni, loto maulalo, ma fai ma faaitaiga lelei o le ola tautua ma faatuatua.

## **3. O le mamanu o lē nofo i le itu taumatau ma le itu tauagavale.**

O le a'oa'oga a le Alii, e le'i sau o ia e auauna atu tagata ia te ia, a ia auauna atu o ia i tagata. Lea lava na taunuu ina ua oo i Ierusalem, auā na faalataina o ia, na fasiotia o ia, ona o le ala lava lea na sau ai o ia. Ina ia faaola le tagata ma mea uma na faia i lona toetu manumalo. O le fai ma auauna, ma fai ma tagata tautua. O le feau sei toe tilotilo le Ekalesia, po o faapefea le mamanu a Keriso, ma le tulaga o loo tatou ola ai faa-auauna a le Alii. O le feau sei toe silasila ane lava, pe faamaoni lo tatou ola ofoina mo Keriso i ana feau.

Mo le silafia o a tatou taulaga na faia mo le fa'aauuina o le galuega faaola a Keriso. Lea e ala ai ona faia galuega fa'aauu o lona malo, e fai taulaga mo le Atua ma lona finagalo mo isi tagata, o e matitiva ma moomia le fesoasoani. Sei toe vaai pe o le isi lea o ala o loo tau papa'u ai le faasoia a le Ekalesia, mo ana feau fa'aauu, ona ua agai ina tupu tele le tupe ua manaomia mo le au penisione.

O faifeau na amata i le 70 tausaga ona penisione lea. Ona faaopoopo lea i ai o le 65 tausaga ona mafai lea ona mālōlō, ua faapea foi ona faaopoopo i ai ma tina ua maua le penisione pe afai na oo le tautua i le 30 tausaga, a ua maluu le tamā. A o le iloiloga o le Faavae na se'i uma nei, na aumai ai nisi o fautuaga ina ia maua le penisione mo faifeau ua aulia le 65 tausaga, tusa lava pe o la e faifeau ma galue, a e ia maua loa lana penisione, e ui ina e lei taliaina. A e o le ata manino lea o le mana'o ua tupu pea ma le lē faamalieina, e toe aliali mai foi i se isi taimi.

Ma e manaomia le faia i ai o se fofō, e ui o le mea ua i ai i le Faavae o le Ekalesia, a e sei toe vaavaai lava faifeau, pe o moni lo tatou alolofa i le Keriso ma

---

lana galuega, pe le ua fai ma faalavelave lea mea, mo feau fia faia pea o le malo o le Atua, ona o i tatou faifeau ma lo tatou manao. Sei toe vaavaai ane pe le ua amata ona mamao le mea ua tatou i ai ma tautinoga o le alolofa moni i le Ekalesia a Keriso ma le tala i lona malo. Ona o le tauanau o faiga taulaga mo feau o le alofa tunoa, e faataunuu ai le manao faapito mo na o faifeau lava o loo tausii nuu. E lelei lava le faamanatu, ina nei faasesēina i tatou i o tatou manaoga lē faamalieina. Ma tatou manatu na o i tatou o loo tigaina i le galuega a le Atua, a e faagalole toatele o le au uso o loo tiga faatasi ma Keriso, a e lē o tagi mai lava. Auā ua latou iloa o le ola faa-auna mo le Alii, o lona tau e faia lava e le Alii le Atua, lea e mafua ai ona tuu malie lo latou soifua tautua. E lē pei o le mea o loo manana'o ai faifeau.

Auā o le mea lea na fai mai ai Keriso, o lē nofo i lo'u itu taumatau ma lo'u itu tauagavale, e lē o ia te au lea ona avatu. A e tau lava o ē ua saunia mo i latou lea mea. Ma o le feau lea e toe faamanatu, o le anavatau a le Alii ma le mamanu o mea ua ia tuuina mai mo i tatou. Tau ina faamanatu o lē nofo i le itu taumatau ma le itu tauagavale o le Alii, o le tagata tautua alofa ia Keriso ma le faamaoni. O le mamanu e lē mafai ona toe tape ma aveeseina mai le tagata faatuatua, i aso uma o le ola. O loo i le Atua e toatasi le tau. Na tautino lava lakopo ma Ioane e papatiso ma inu i le ipu a Keriso, a e fai mai le Alii, lua te inu lava i le ipu ou te inu ai, ma papatiso oulua i le papatisoga e papatiso ai a'u, a o le nofo i lo'u itu taumatau ma lo'u itu tauagavale, e lē o ia te au lea ona avatu, a e tau lava o e ua saunia mo i latou lea mea.

Le au faatuatua mo le Atua, ia tatou manatua le mamanu a le Alii, na te faailoa mai lava se mea e fai ma faatosina mo lona finagalo, na o tiga lava ma puapuaga le ala e taunuu ai i le mamalu. A ua na o ana fetalaiga tuu sao e manatua pea, e fai ma ala e faalototele, faamafanafana, i le tagata tautua lelei, auauna ma le faamaoni, *“Le auauna lelei e, ma le faamaoni, ulufale mai ia i le fiafia o lou Alii.”* Ia manuia ona o Iesu. Amene.

**Saunia: Susuga Enefatu Lesā FT,  
EFKS Tanoalei'a,  
Matagaluega VAIMAUGA.**

---

## **FONO TELE 2022**

O le Fono Tele o leni tausaga na tolopo mai le taimi masani ai ia Me, na faataunuu i aso 19 - 30 Setema, ona o aafiaga o le Faama'i Koviti-19. O le faato'a toe aofia potopoto lea ma auai mai usugafono mai Matagaluega i fafo, talu mai le tausaga 2019. Na faatomua le Iloiloga o le Faavae i aso 12 - 15 Setema, o le galuega foi na tolopo mai ona o le Faama'i. O le autu o le Fono Tele o leni tausaga, **'Tumau le Alofa o le Tasi i le Isi.'** O le vaiaso muamua sa faia ai fono a komiti eseese, sauniga ma fono a le Mafutaga Tina, o sauniga Lotu a le Au Toeaina (Ta'ita'i-Amuia Seuata FT, ITU O TANE), Lotu Au Taumafai (Leauma Faletose FS, ITU O TANE), Lotu o Nuu Ese (Ioane Viliamu FT, FAASALELEAGA), Lotu Au Leoleo (Kirisimasi Sani FS, FALEATA). O le sauniga o le Faauuga o A'oa'o mo le tofi Faifeau Samoa (Siolo Tauati FT, APIA), o le Lotu a Tupulaga (Tuana'i Uesile FS, APIA) ma Faafiagiaga (APIA), ona taualuga ai lea o le ulua'i vaiaso i le tufaina o Faila a Usufono.

O sauniga lotu o le Aso Sa i le taeao o le Talisuaga Paia a le Alii i le Fale Iupeli (Isaako Viki FT, MALUA), ma le Fale o Tina (Aila Patea FT, VAIMAUGA), na tolaulau ai suafa o le auuso, o le afaigaluega Toeaina ma Faifeau ma Faletua, o A'oa'o Fesoasoani ma Tiakono, Tama ma Tina sa tatou galulue faatasi i le ola nei, a ua valaauina e lo tatou Matai. O Sauniga Lotu i le afiafi i le Fale Iupeli (Apelu Semu FS, FAASALELEAGA), ma le Fale o Tina (Hemi Faatonu FS (AANA)). Ona faagasolo lea o le Fono Tele i le vaiaso mulimuli, sa faamaonia ai le Lipoti a le Komiti Iloilo Faavae, faamaonia Iugafono Fono Tele talu ai, talanoaina Mau Tu'u Sa'o i le Fono Tele mai Matagaluega ma Mau mai Komiti, faamaonia Galuega a Komiti taitasi o leni tausaga faa fono. O le Tala o Tupe 2021-2022, ma le Tala Faatatau o Tupe 2022-2023 sa talanoaina ma faamaonia.

I le tulaga o faiga palota, ua toe faamaonia Laulau a le nofo a Komiti, ma ua toe tofia le Su'etusi o Su'a Rimoni Ah Chong mo le isi tausaga 2022-2023. I le palota o le Sui Taitaifono Fono Tele, na fulisia le Fono Tele i le susuga Iosefa Atapana Uilelea FT e toe fa'aaui i le Laulau, mo le isi tausaga faa-Fono Tele. Na taualuga le Fono Tele i le se'ei ai o le susuga Tunumoso Soliola Iosia FT i lona nofoa Taitaifono, ma na ta'ita'i le sauniga e tapunia aloaia ai le Fono Tele o leni tausaga. Malo le tofa saili! Ia viia le Atua!

---

# A'OA'O FAAU'U FAIFEAU SAMOA 2022.

---

## 1. CHALLIS PUPI.

Nuu o le Faifeau: Vaitele-uta  
Tausaga i Malua: 2016-2019  
Galuega o galue ai: Ofisa Fanua ma Fale EFKS.  
Tausaga na amata ai: 2020, ua 3 tausaga.  
Suafa o le Faletua: **SAVANETTA KASIA PUPI**  
Nuu o le Faletua: Saanapu - tai.  
Matagaluega e o mai ai: **FALEATA**

## 2. CLARKE T USANI STOWERS.

Nuu o le Faifeau: Tafagamanu Lefaga, Saleaamua.  
Tausaga i Malua: 2014-2017  
Galuega o galue ai nei: Faia'oga Kolisi Malua  
Tausaga na amata ai: 2020, ua 2 tausaga + 9 masina  
Suafa o le Faletua: Fofogaolevai Stowers.  
Nuu o le Faletua: Sasina, Matautu Falelatai, Tafitoala.  
Matagaluega e o mai ai: **ITU O TANE**

## 3. FAALEFU TUMUTALIE.

Nuu o le Faifeau: Vaitele-uta, Aopo, Saanapu.  
Tausaga i Malua: 2015-2018  
Galuega o galue ai nei: Ofisa A'oa'oga Kerisiano.  
Tausaga na amata ai: 2019, ua 3 tausaga.  
Suafa o le Faletua: **BELLAROSE TUMUTALIE**  
Nuu o le Faletua: Falefa.  
Matagaluega e o mai ai: **FALEATA**

## 4. FALEALI'I AFAMASAGA.

Nuu o le Faifeau: Fasitootai.  
Tausaga i Malua: 2016-2019  
Galuega o galue ai nei: Ofisa Aoaoga Kerisiano.  
Tausaga na amata ai: 2020, ua 3 tausaga.  
Suafa o le Faletua: **IRIS LEUTEIFUIONO**  
Nuu o le Faletua: Vaitele-fou.  
Matagaluega e o mai ai: **AANA.**

## 5. FALESEFULU FALESEFULU

Nuu o le Faifeau: Letogo, Salelologa, Palauli.  
Tausaga i Malua: 2016-2019  
Galuega o galue ai nei: Faiaoga Kolisi Malua fou.  
Tausaga na amata ai: 2020, ua 3 tausaga.  
Suafa o le Faletua: **VE'Ā FALESEFULU**  
Nuu o le Faletua: Letogo, Saanapu.  
Matagaluega e o mai ai: **VAIMAUGA**

## 6. DR. FATILUA FATILUA.

Nuu o le Faifeau: Salimu, Apia-uta, Papa Puleia, San Francisco Amerika.  
Tausaga i Malua: 2013-2016  
Galuega o galue ai nei: Sa galue muamua Faia'oga Kolisi Faafaifeau Pasefika i Fiti, 2018 - 2022, a e le'i auina mai e Faia'oga Kolisi Faafaifeau Malua.  
Tausaga na amata ai: 2022, 1 tausaga.  
Suafa o le Faletua: **VAITU'UTU'U FATILUA**  
Nuu o le Faletua: Leusoalii, Laulii, Lona Fagaloa.  
Matagaluega e o mai ai: **AMERIKA**

## 7. FAULALO KENNAR.

Nuu o le Faifeau: Matautu Falealili, Sapo'e Falealili.  
Tausaga i Malua: 2016-2019.  
Galuega o galue ai: Faia'oga Kolisi Leulumoega Fou.  
Tausaga na amata ai: 2020, ua 3 tausaga.  
Suafa o le Faletua: **BEAUTY KENNAR.**  
Nuu o le Faletua: Apai Manono.  
Matagaluega e o mai ai: **AANA.**

## 8. IONA LEA'ANĀ

Nuu o le Faifeau: Matautu Lefaga, Saanapu Safata.  
Tausaga i Malua: 2010-2013  
Galuega o galue ai: Faa-misionare Oregon, Amerika.  
Tausaga na amata ai: 2021, 1 tausaga (na pasia e faau'u ona o le vava mamao o Aulotu).  
Suafa o le Faletua: **PEKA TIATIA LEA'ANĀ**  
Nuu Faletua: Lalomalava, Avao, Sapapalii, Lufilufi.  
Matagaluega e o mai ai: **AMERIKA.**

## 9. KERESOMA ALOALI'I SEUALA.

Nuu: Salesatele, Lalomanu, Fasitootai, Vaitoomuli.  
Tausaga i Malua: 2015-2018.  
Galuega galue ai: Ofisa A'oa'oga Kerisiano (Musika)  
Tausaga na amata ai: 2019, ua 3 tausaga.  
Suafa o le Faletua: **TUVALU IESE SEUALA.**  
Nuu o le Faletua: Vaovai, Satuimalufilufi.  
Matagaluega e o mai ai: **FALEATA.**

---

**10. KILEPOA IOANE.**

Nuu o le Faifeau: Salani, Lotofagā Safata, Sapunaoa.  
Tausaga i Malua: 2007, 2016-2018.

Galuega o galue ai nei: Ofisa Fanua ma Fale, EFKS.  
Tausaga na amata ai: 2020, ua 3 tausaga.

Suafa o le Faletua: **TOLU SALIMAAMILALE**  
Nuu o le Faletua: Sapapali'i.

Matagaluega e o mai ai: **FALEALILI SAFATA SIUMU.**

**11. LETAULAU ESAU POUFĀ.**

Nuu Faifeau: Vailoa Palauli, Vaitoomuli, Salelologa.  
Tausaga i Malua: 2016-2019

Galuega o galue ai nei: Faia'oga Kolisi Tuasivi.  
Tausaga na amata ai: 2020, ua 3 tausaga.

Suafa o le Faletua: **SARAI LETAULAU.**  
Nuu o le Faletua: Saleilua Falealili, Matautu Lefaga.  
Matagaluega e o mai ai: **FAASALELEAGA.**

**12. MATHEW SIMATI.**

Nuu Faifeau: Vaimoso, Matautu Falealili, Lalomanu.  
Tausaga i Malua: 2016-2019.

Galuega o galue ai nei: Faia'oga Kolisi Nuuausala.  
Tausaga na amata ai: 2020, ua 3 tausaga.

Suafa Faletua: **DOROTHY FAGASUA SIMATI.**  
Nuu o le Faletua: Fasitoo-tai, Sataua, Lau'i'i.  
Matagaluega e o mai ai: **FALEATA.**

**13. OLI LEVI.**

Nuu o le Faifeau: Falealupo.  
Tausaga i Malua: 2015-2018.

Galuega o galue ai nei: Ofisa A'oa'oga Kerisiano.  
Tausaga na amata ai: 2020, ua 3 tausaga.

Suafa o le Faletua: **PETI OLI.**  
Nuu o le Faletua: Sapo'e Falealili.

Matagaluega e o mai ai: **ITU O TANE.**

**14. ONOSA'I NOFOAIGA.**

Nuu: Falese'ela, Tafitoala, Nofolii, Pata, Apai Manono.

Tausaga i Malua: 2015-2018.

Galuega galue ai: Tausitusi, Komiti Atina'e Ekalesia.  
Tausaga na amata ai: 2019, ua 3 tausaga.

Suafa Faletua: **ALOESE TI'ITI'INOFOAIGA.**

Nuu o le Faletua: Savaia & Tafagamanu Lefaga,  
Sataoa Safata, Vailele.

Matagaluega e o mai ai: **AANA.**

**15. PEIA LESATELE.**

Nuu o le Faifeau: Sataua, Sala'ilua, Asau.  
Tausaga i Malua: 2015-2018.

Galuega: Faifeau Tausi nuu, EFKS Avata, Falealupo.  
Tausaga na amata ai: 2020, ua 2 tausaga.

Suafa o le Faletua: **ESETALESATELE.**

Nuu o le Faletua: Sataua, Saleaula, Lalomalava.  
Matagaluega e o mai ai: **ITU O TANE.**

**16. SUAFA'I SOLIOLA.**

Nuu o le Faifeau: Lepa, Saleapaga.  
Tausaga i Malua: 2016-2019.

Galuega o galue ai nei: Faifeau Tausi nuu, EFKS  
Crossroads, Niusauelese Ausetalia.

Tausaga na amata ai: 2020, ua 2 tausaga.

Suafa o le Faletua: **LEA SOLIOLA.**

Nuu o le Faletua: Fasitootai, Neiafu.

Matagaluega e o mai ai: **NIUSAUELESE.**

**17. SUNITA NUA.**

Nuu o le Faifeau: Solosolo.  
Tausaga i Malua: 2015-2018.

Galuega: Faifeau Tausi nuu, EFKS Hastings.

Tausaga na amata ai: 2020, ua 2 tausaga.

Suafa o le Faletua: **TUANO'A NUA.**

Nuu o le Faletua: Vaisala, Sataua.

Matagaluega o mai ai: **LAUMUAO AOTEAROA**

**18. TUTOATASI TOALIMA.**

Nuu o le Faifeau: Moataa.

Tausaga i Malua: 2014-2017.

Galuega o galue ai nei: Faia'oga, Kolisi Malua.

Tausaga na amata ai: 2020, ua 3 tausaga.

Suafa o le Faletua: **FETU TUILAGI.**

Nuu: Malie. Matagaluega e o mai ai: **VAIMAUGA.**

**19. VALOAGA ROPATI.**

Nuu o le Faifeau: Vailuutai, Samata.

Tausaga i Malua: 2014-2017.

Galuega o galue ai nei: Ofisa Aoaoga Kerisiano.

Tausaga na amata ai: 2020, ua 2 tausaga.

Suafa o le Faletua: **UATIFOTI ROPATI**

Nuu: Saipipi.

Matagaluega e o mai ai: **MANUKAU**

---

# **TALA'AGA SOIFUA GALULUE O TOEAINA & FAIFEAU PENISIONE 2022**

---

## **1. SIOLO PAULA SAUFATU TAUATI FT**

Aso Fanau: 13 Ianuari 1952.

Nuu: Samalaeulu, Lano, Salesatele, Sapunaoa.

Aso Faaipoipo: 12 Novema 1972.

Soifua A'oa'oina:

1. A'oga Faifeau, A'oga Tulagalua - Samalaeulu.

2. A'oga Faa-Itumalo - Fagamalo.

3. Kolisi Vaipouli.

4. A'oga Faa-Faia'oga - Malifa.

5. Kolisi Faafaifeau Malua: 1975 - 1978.

6. Sikolasipi Ekalesia - Kolisi Faafaifeau Pasefika i Fiti: 1979 - 1981 (Faailoga BD Honors).

Soifua Galue Ekalesia:

1982-1985: Faia'oga Kolisi Leulumoega Fou.

1985-2022: Osi Feagaiga EFKS Apia-uta.

Tofi i le Ekalesia:

1992-2004: Failautusi Pulega Apia Sasa'e.

1990-2022: Sui Mtg Apia i le Komiti Au Taumafai.

2006-2008: Komiti Tupe Matagaluega Apia (Sisifo).

2008-2022: Tofia aveva ma Faifeau Toeaina.

1990-2022: Teutupe Sosaiete Malua Tuai.

1990-2010: Failautusi Mafutaga LMS Tuai.

2019-2022: Taitaifono LMS Tuai, Lala i Samoa.

Faletua: **MERITA LAFOA'I TAUATI**

Aso Fanau: 23 Mati 1954.

Soifua Galue i le Ekalesia:

O le Faletua o le Faifeau.

Taitaifono TPT

Taitaifono Faletua Au Toeaina.

Aulotu: EFKS Apia -uta

Pulega: Apia Sasa'e

Matagaluega: **APIA.**

## **2. IOANE VILIAMU SAMOA FT.**

Aso Fanau: 6 Mati 1952.

Nuu: Foua Salelologa, Avao, Lano, Taga, Fasitootai.

Aso Faaipoipo: 26 Novema 1977.

Soifua Galue i le Ekalesia:

1972-1976: A'oa'oina Kolisi Faafaifeau Malua.

1977-1979: Faifeau EFKS Samusu, Aleipata.

1980-2022: Faifeau EFKS Fogapoa (42t, 6m)

1996-2016: Failautusi Pulega Safotulafai, F/aga.

2016-2022: Toeaina Pulega Safotulafai Faasaleleaga

1981-2016: Komiti Au Taumafai, Faasaleleaga.

2006-2016: Komiti Feau Eeseese mai le Komiti Au Taumafai.

2018-2022: Sui Peresetene Komiti Au Taumafai.

Faletua: **VAITA'I IOANE VILIAMU SAMOA.**

Nuu: Ulutogia, Lalomanu, Saanapu, Malaemalu, Sapunaoa.

Aulotu: EFKS Fogapoa.

Pulega: Safotulafai.

Matagaluega: **FAASALELEAGA.**

## **3. MATAPOO PENIAMINA FT.**

Aso Fanau: 12 Setema 1956.

Nuu: Foaalalo, Gaga'emalae Savaii.

Aso Faaipoipo: 9 Setema 2005.

Soifua Galue i le Ekalesia: Faifeau Tausi Nuu.

Tofi i le Ekalesia: Faifeau, Faifeau Toeaina.

Faletua: **PENINA PENIAMINA.**

Nuu: Vailoa Faleata.

Aulotu: EFKS Savali o le Filemu, Las Vegas USA.

Pulega Matu, Matagaluega **AMERIKA.**

## **4. LEAUMA FALETOESE FS**

Aso Fanau: 3 Novema 1951.

Nuu: Solosolo, Vaisigano Apia, Faleasi'u.

Aso Faaipoipo: 20 Setema 1980.

Soifua Galue i le Ekalesia:

Faifeau Tausinuu EFKS Falealupo-uta.

2010 Fep - Iulai: Failautusi Pulega Itu Asau.

2010-2013: Failautusi Matagaluega Itu o Tane.

2019-2022: Komiti Au Leoleo.

Tofi i le Ekalesia:

Faifeau Samoa & Komiti Au Leoleo.

Faletua: **SALOMINA VAEGA FALETOESE.**

Nuu: Faga (Sapini), Fusi (Safotulafai).

Aulotu: EFKS Falealupo-uta.

Pulega: Itu Asau.

Matagaluega: **ITU O TANE.**

---

# O LE PEROFETA MULIMULI

---

*(O le tala faafagogo faasolo faaSamoaia mai le tusi 'The Last Oracle' tusia e James Rollins)*

“A o le ā tonu lava le ituaiga su'esu'ega sa ia faia?”  
O le fesili atu lea a Karai e faamalosī au ia te ia.  
“Soo se mea e te iloa e ono fesoasoani mai.”

Na mapuea le tama'ita'i. “E mafai ona ou ta'uina  
atu le mea na amata ai ona faavalea le mafaufau o  
lo'u tamā i mataupu tau lagona ma faalogona.” Na  
ia silaloa i lo la'ua va. “E iloa e seisi o oulua ulua'i  
saililiga na fai e Rusia e faasino i faalogona?”

Na lūlū ulu o le to'alua.

“O se saililiga e mata'utia le leaga. A e na fai ma  
lavelave e femilosa'i ai ma su'esu'ega a lo'u tamā i  
mea tau neurofisiolo. Pe a ma le lua sefulu tausaga  
talu ai, na tuu eseese ai e Rusia se pusi fanau mai  
lana toloa'i. Ona latou ave lea o le toloa'i i lalo i se  
vaa mauulu. A o vaavaai ma su'esu'e amioga a le  
pusi fanau, na tapē ai e le 'auvaa o le vaa mauulu se  
tasi o tama'i pusi o le toloa'i. O le taimi tonu lava na  
tupu ai lena mea, na oso maualuga a'e ai le tātā o le  
fatu o le pusi aumatua, ma lona fai'ai sa faamauina le  
matuā tiga ogaoga. Na faalētonu le pusi ma sa matuā  
ita lava. O isi aso na sosoo ai, na latou fasi mate  
auaua'i ai isi tama'i pusi. Ma o taimi tonu lava e  
mate ai le tama'i pusi, e faapea foi ona iloa ai uiga  
fa'aalia i lagona ma faalogona o le meaola aumatua.  
E ui ina nonofo valavala ma eseese i nofoaga vāvā  
mamao, a e na iloa lelei e le aumatua le mamate o  
lana toloa'i.”

“O se ituaiga o lagona faa-matua,” na fai atu ai Karai.  
Sa luelue le ulu o Elisapeta. “Po o le malamalama  
faa-natura o fesootaiga. O le a lava le ituaiga, a e  
mo lo'u tamā, o se faamaoniga manino lea o se ituaiga  
fesootaiga faa-paiolo, o su'esu'ega i totoga o  
meaola. Na ia taula'i lana su'esu'ega e saili le faavae  
faa-neura mo lea foi ituaiga fesootaiga mata'utia. Na  
i'u ai ina la'ua fai paaga ma le polofesa Initia, o lē sa  
a'oa'oina amioga faapea i tagata o talitonuga  
faalilolilo ma tulaga ese o lea atunuu.”

“O a amioga?” o le fesili atu lea a Penita.

Na miti le kofe vevela a Elisapeta, ma lūlū mālie  
lona ulu. “Na amata ona faitau e lo'u tamā ripoti o  
su'esu'ega ma tala faasolopito o tagata e i ai taleni  
faapitoa o le mafaufau. Na ia vele a'e i luga a'a ma  
tātupu, o mataupu sa mafai ona faamaonia, le ituaiga  
mataupu e seāseā tupu, e iloga ona faamaonia e  
saienitisi iloga le popoto. E pei o Alapati Einesiteina.”  
Sa le'i nātia e Karai lona te'i. “Einesiteina?”

O le lue o le ulu. “I le sooga o seneturi, o se fafine  
Initia e igoa ia Sakunatala, na aumai i iunivesete o le  
lalolagi ina ia fa'aali ana taleni faapitoa ma le maoa'e  
o mea na te mafai. Sa le'i maoa'e sona a'oa'oina  
ese mai le A'oga Maualuga, a e maoa'e lona atamai  
i mea tau matematika. I le sailiga o tali o numera  
faigata i lona ulu.”

“O se ituaiga o taleni atamai faapitoa?” na fesili atu  
ai Penita.

“E sili atu nai lo lena. Na te 'u'u le penisina i lona  
lima, e mafai e le fafine ona amata tusi le tali a e le'i  
faia pe faaleoina mai le fesili. E oo lava ia Einesiteina  
sa ia molimau i le atamai talenia o le fafine. Na ia tuu  
i ai se fesili i se numera na alu le tolu masina o ia  
taumafai e tali, e aafia ai ni sitepu faasolosolo se tele.  
E le'i uma ona ia lauina atu le fesili, a ua amata ona  
tusi e le fafine i le penisina le tali, o se tali na ufitia  
atoa ai le umi o le laupapa. Na fesiligia e Einesiteina  
pe na faapefea ona ia mafai ma silafia ona maua le  
tali, a e na te le'i iloa; fai mai o fuainumera na ona  
feosofi mai lava i luma o ona mata, ma na ia tusi loa  
i lalo.”

Na silaloa atu Elisapeta ia te i la'ua, e manino sa ia  
faatali i se lē talitonu. A o Karai sa na ona ia luelue  
atu e fa'auau. O lona taliaina o nei tala aunoa ma  
se fesiligia, na peisea'i sa fai ma faalavelave ia te ia,  
peisea'i afai e te'ena e Karai nei tala o le a  
ta'umamaina ona lagona i totonu ia te ia.

“Sa i ai foi ma isi mataupu,” na ia fa'auau ai. “O  
totonu foi o Initia. O se tamaitiiti na ia tosoa se taavale  
la'u pasese pa'u - lua i Matarase. E mafai ona ia  
talia fesili faamatematika e aunoa ma le lagonaina o  
le fesili. O lana faamatalaga faapea e faaosofia o ia i  
le lagona fiafia pe afai e latalata atu ia te ia se tagata  
e i ai sona faafitauli tau numera. Ma o le tali o le a  
aliali mai faatulaga i laina i lona ulu 'pei o ni fitafita'.  
Na i'u ina ave i Okesefoti e tofotofoto siaki ai. Ina ia  
faamaonia lana taleni ma le atamai faapitoa, na ia  
talia ai fesili faamatematika sa le'i mafai ona tali i na  
ona taimi. Na faamauina e Okesefoti faai'uga o lana  
su'ega. O le sefulu tausaga mulimuli ane, ina ua siitia  
le malamalama, sa faamaonia ai e sa'o lelei tali a le  
tama ititi. A o le taimi lena ua oti le tama, ina ua  
matua lona soifua.”

Na tuu ifo i lalo e Elisapeta lana ipu kofe. “E lē gata  
ina mata'utia tala i nei mataupu na tula'i mai, a e na  
avea ma faatupu fememea'i e le'i ai se i'uga mo



lo'u tamā. Na ia mana'omia ni tagata poo manu sa fai ai su'esu'ega, o loo feola mai pea. O le ala lea na ia fa'aaau ai pea le fesoota'i, faamau ma fai su'esu'ega, ma na maua ai nisi o laasaga e sili atu ona mata'utia sa faaputupu i Initia. Mai o latou tagata tapua'i faa-misiterio ma auala o mafaufauga loloto faa-Ioki. I lena taimi, e i ai nisi saienitisi ua uma ona latou mauaina le faavae faa-fisiolo o le tele o agavaa ma taleni a tagata Ioki. E pei o le gafatia ona tali atu i le mālūlū ogaoga mo ni aso e tele, e ala i le fetuutuuna'i o le fetafea'i o le toto i o latou lima ma le pa'u o le tino. Po o le faaoge aunoa se mea'ai mo masina, e ala i le faamaulaloina o le fua faavae, o elemeni i taumafa."

Sa luelue le ulu o Karai. Sa ia a'oa'oina le tele o a'oa'oga faa-ioki faapea. E auga uma lava i le iloa ona faatonutonu le mafaufau, pe faapipii atu i gaioiga o le tino e lē masani ma lē mana'o ai.

"Sa tofu i totonu lo'u tamā i tala faasolopito o Initia, o la latou gagana, e oo lava i tusitusiga paia ua au tupulagā mai perofetaga anamua. Na ia saili ma maua tagata Ioki e talenia ma popoto faapitoa, ma fai ai ana su'esu'ega: o siaki o le toto, o tui ma fa'ata, o vailiga o le fai'ai, e oo lava i le sailiga o latou tamaliiaga ma ituaiga tagata, e tala ai o latou gafa i tua e fesoota'i ma i latou e silisili ona talenia. O le aotelega lava, na ia taumafai e faamaonia faa-saienitisi, e i ai se faavae faa-meola i le fai'ai, o loo i ai i le sailiga na fai e Rusia lea na fa'aaoga ai le pusi aumatua."

Na goto ifo Penita i lona nofoa. "E lē tioa a taumafai e miti'ia mai o ia i le poloketi Sitanafoti. E lē taumateina o ana su'esu'ega sa so'oso'o-tau'au ma faapipi'i atu i a latou autū."

"A e pe aiseā lava na fasiotia ai lo'u tamā i nei mea? Ua tele tausaga, ua leva tele." Na fetau lana vaai ma le pupula a Karai. "A o le a le mea a lena ulupoo manukī e fai i nei taualumaga?"

"Tatou te le'i iloa i le taimi nei," o Penita lea, "a e oo atu i le taeao, ona tatou iloa atili lea e uiga i le ulupoo." Sa faamoemoe Karai e sa'o lana tala. Sa i ai se vaega'au o tagata popoto faapitoa na valaaulia i le Sikima e Iloilo ma su'esu'e le ulupoo. Sa augatā lava Karai, a o lafo i le meli le ulupoo i le ofisa tutotonu. O lona iloa o le ki lea i le misiterio, na ala ai ona musu tele e aveese mai lana vaai.

O le tu'itu'i mai o le faitoto'a na uma ai nisi talanoaga. Na faalue faataamilo ane Penita; a e tu i luga Koualasaki, ma le tasi o ona seevae o loo 'u'u i le lima.

Na tu a'e foi i luga Karai.

Sa i ai leoleo ofu savili na leoleo i fafo o le fale. Pe afai e i ai se faalavelave, sa tataua ona valaau uaealesi mai. Ui i lea, sa tatala e Karai faamau o lana sulufana ma se'i ane i fafo lana fana otometi. E tofu leoleo ma leitiō, a e aiseā ua tu'itu'i mai ai lenei leoleo?

Na ia tālo atu i isi ina ia sōsō ese i tua, a o ia faalatalata atu i le faitotoa i luma. Na ia tausisi i le itu, ma kolosi atu i se mea pu'e ata laititi o i ai ni alaata se fa, o loo ola ma faailoa ai ata o pu'e mai mea pu'eata i fafo. O le alaata pito i luga i le itu tauagavale, sa iloa ai ata o le faapaologa.

E to'a lua nisi sa tutū ai, o nai sitepu mai le faitoto'a. O se tamaloa pa'e e sa ofu sona tali matagi lanu mūmū, na ia 'u'u le lima o se tamaititi. O se teine. Sa ta'aloalo i se lipine i lona lauulu. Sa maitau e Karai e leai se taufaafefe o lamatia ai i le amio a le tamaloa. I le isi ona lima sa i ai se affi o pepa mafiafia. Pei se teutusi. Na punou ifo le tamaloa i le pito i lalo o le faitoto'a.

Sa tu sasa'o Karai ma lona mata'alia, peita'i ua na o se laupepa lanu samasama. Sa faaulu mai e le tamaloa i lalo o le faitoto'a. Na lele mai le pepa i luga o le fola laupapa o le potu tele. Na alu atu tonu lava i tamatama'ivae o Karai.

Na ia faatau pupula ifo i se tusitusiga fe'osi'osi a se tamaititi i penivali uliuli. I ni 'osi'osi mata e nunumi a e sa taatitia fuafua lelei, na iloa ai le ata o le potu autū o le fale malu puipua. O le ta'inafi, o nofoa, le sofa. Le faatulagaina tonu o le potu o loo i ai. Sa i ai foi ma le ata o se to'afā. E to'a lua na nonofo i luga o le sofa, e toatasi i luga o le nofoa. O le isi toatasi e lapo'a teisi sa faalagolago i autafa o le ta'inafi ma lona seevae i lona lima, lona uiga o Koualasaki lena. O le ata a le tamaititi o lo latou potu.

Na toe silaloa Karai i le televise o pu'e ai ata.

Sa tosina atu lana vaai i gaioiga sa femigoia'i mai isi alaata o meapu'eata e tolu mai fafo. Na aliali ane ni tamaloa se to'a tolu, o la'ei foi ni o latou talimatagi. Na vaaia e Karai le tasi leoleo, ma le isi, sa taofia faasiilima i se fana.

Na laa ane Koualasaki i autafa o Karai, i se gaioiga e lē pa'ō o ona vae sa se'e totini. Na ia vaavaai foi i le ata ma mapuea.

"Lelei tele," o le manatu lea o Koualasaki. "O le a le mea e fai e outou uma? E lafo tuatusi mo la outou lafitaga i luga o le Upega Tafailagi?"

I fafo, sa faamalosi ai leoleo ona tootutuli i o latou tulivae.

---

Sa si'omia le fale. Na pei i latou ua pu'ea i se mailei. I le isi itu o le lalolagi, o le tamaloa e igoa ia Monike na sailia sona ia auala mo lona saolotoga.

A o tutū faaleoleo tamaiti e toatolu i le faitoto'a o lona potu i le falema'i, na taumafai atu Monike e ofu i se ovalola mafiafia, lanu moana malosi e tutusa ma le ofutino lima uumi na ia ofu. Sa faigata tele ona e tasi le lima. Pau mea na totoe i luga o le nofoa o se pulou lalaga lanu uliuli ma le pea totini mafiafia. Na ia tuu a'e le pulou i lona ulu, ona faaofi lea o totini sa tau fufusi, a e masaesae.

O lona tuua toatasi na taumafai ai Monike e tau faamaopopo mai laasaga o lona faanenefu, e ui ina itiiti se fesoasoani na maua mai i le tau faavasegaina o le tulaga tonu o i ai lona ola. Na te le'i manatua lava se mea e tasi i tua atu o lona ala a'e i totonu o lenei potu. Ui i lea o le gaioiga e fai ona laei sa fesoasoani e faasagatonu ona vae.

Na ia faasoso'o atu i le tama aupito matua, Konesetativo, i le faitoto'a, o se u'amea sa i ai se loka i le itu i fafo. O le mamau o le faitoto'a na faamaonia ai sa fai o ia ma pagota, ma o se sola'aga le gaioiga lenei o loo latou fai.

O le tama aupito laititi, Piota, na ia uu le lima o Monike ma uuna'i atu i lalo o le potu, 'alo ese mai le sulua i se fale o teine tausima'i. Na ia manatua le talosaga atu a le tama talu ai.

Faaoia i matou.

Sa le'i malamalama Monike. Faaola mai le ā? Mai ia te ai? O le teineitiiti, na ia māua o lona igoa o Kisika, na ta'ita'ia le auala i se fasitepu i tua, sa faamalamalama e se faailo mūmū. A o latou ui atu i ona lalo ifo, na tepa a'e Monike i mata'itusi.

O le faa-Sairili.

Pei o loo i ai o ia i Rusia. E ui ina leai sona manatua, a e na ia iloa e lē o se nofoaga lenei mo ia. O ona manatu sa faapalagi. Aunoa ma se namu faa-Peretania. Lona uiga o ia o se Amerika. Pe afai na te iloa lea mea, aisea na te lē mafai ai ona...

O se faaputuga o faailoga na faafuase'i ona faatauaso ai o ia, o ni ata faa'emo faafulisa mai se isi olaga, ua feosofi mai pei o le 'emo o se mea pu'eata i lona ulu ... o se 'ata'ata ... o se umukuka o i ai se tagata o ū atu lona tua ia te ia ... o le ulu u'amea o se aga'ese iila i le vanimonimo lanu moana ... o le susulu o molī mai le loloto o vai pogisā...

Ona toe mou atu lea.

Sa tu'itu'i mai lona ulu. Na ia taumafai e pipii atu i lagolago o le sitepu ma tago atu lona lima ua mutu.

O lona ogālima manu'a na sese'e atu i luga o faalagolago. Toeititi lava a ia pa'ū i le lē paleni o lana tu. Na ia faatau pupula ifo i lona lima o tautau ma manatua se tasi o ata faa'emo.

... o le ulu u'amea o le aga'ese iila i le lagi lanu moana. Pe mata sa faapea ona tupu?

O luma atu, sa faatelevave ifo ai tamaiti i le ala fasitepu. Vaganā le tama pito laititi. Sa taofi e Piota le isi ona lima o loo lelei. Na ia faatau pupula a'e ia Monike i ni mata matuā lanu moana toetoe ina a lanu papa'e. Na taofi ma oomi e tamatama'ilima laiti ona lava lima, e faalototele. Na ia 'u'una'i lemu atu o ia i luma.

Na ia tau sulu a o mulimuli atu i isi.

E leai nisi na latou tau atu ai, ma ulufafo atu ai i se faitotoa i le itu i tua ma fafo i se po taaligoligoa ma le pouliuli. O le sau mālūlū na tāūpe i le susū o le 'ea. Na mānavanava loloa i totonu e Monike le 'ea, sa faaitiitia ai le tātā faa-samala o lona fatu.

O le ūū leo tele o se afi eletise na faatumulia ai totonu. Na vaavaai atu Monike i le telē ma le faataatiaga o le falema'i, i ona atu falega o faasolosolo maualalo atu i itu, ma faataamilo i fale fogafale lima e lua.

"O mai. I le itu lea," na fai mai ai Konetativo, o ia ua ta'ita'i nei le ala.

Na latou faanatinati atu i se ala pogisa i le va o le falema'i ma se pa e a'e i luga o fogafale e lua i le itu tauagavale. Na tepa a'e Monike, taumafai e faatulaga lana tu. O ni nai mōlī sa mumū i tua atu o le pa, na sulua ai taualuga fola maa i nisi fale sa punitia faalafi. Na latou taunuu i se tulimanu ona sulusulu atu lea i tua o le nofoaga o puipua i le pa. O le eleele sa malō pei o maa, sa mase'ese'e i le sau. Sa leai ni molī i le itu lenei i tua. Na pau le tulaga sa maitauina e Monike o le ala na latou ui mai ai, sa fausia i poloka simā. Sa faasolosolo ai i luga lona alofilima a o latou taufetuli. Sa ia iloa mai le talatala ma le lē paleni o piliki, o se galuega na fai faanatinati lava.

Na lagona e Monike se tagi taufaafefe o luko i luga o le pa. Na mulimuli mai ai le ou malosi ma le gū ma'ama'ai.

Na faalēmū ona vae. O manu. Pe mata o se ituaiga pa manu lenei mea?

Sa pei e faitau e le tama umi ona mafaufauga, o Konesetativo sa tepa ane i tua ma memumemu ane le upu 'lafumanu', ma talotalo atu e tope mai i luma. Lafumanu?

*(Soso' o atu Sulu Samoa Oketopa 2022)*

---

## LOTU AU LEOLEO I LE FONO TELE 2022

Tusi Faitau: 2 Timoteo 1 - 7.

Matua: 2 Timoteo 1: 6, “*O le mea lea ou te faamanatu atu ai ia te oe, ia toe faamumū le meaalofo mai le Atua, o loo ia te oe lea i le faae’atu o o’u lima.*”

Manatu Autu: TOE FAAMUMŪ MEAALOFA  
ALE AGAGA (Rekindle the Gifts of the Spirit)

### FOLASAGA

E ui lava o le **tusi fa’a-faifeau a PAULO** e faasino i le tagata e toatasi (*o Timoteo lea*), peitai ua atagia i lenā vaiata; tulaga ogaoga sa i ai le **Ekalesia Kerisiano ma le ‘Au Galulue**. O tagata o lo’o tau ‘apaapa i se saolotoga auā ua taomia i faafitauli eseese. E lē gata o le Aposetolo ma lona saisaitia i le Falepuipui, a ua lamatia foi le Galuega Tala’i i *sauaga mamafa Fa’a-Emeperoa a Roma*; pulega e tete’e i le Fa’aKerisiano. Tainane foi o taupulepulega leaga a **Iutaia Lē Kerisiano**; ua latou faaofi ane talitonuga sesē fa’atupu vevesi.

E ui ua taunuu PAULO i le tauafiafi o lona soifua valaauina, sa faatō ai ona faiva mo IESU; a e mafatia ona pei o sana tautua ua lē mae’a ona faia. Ua noanoatia a e vaavaai atu i le *Galuega a le Atua* foliga ua tuulafoa’iina. O lana auauunaga sa faaeaea i le Atua; e toe faai’u foi i le Atua. Fai mai ana upu tautino; “*Ou te faafetai atu i le Atua, o Lē ou te auuana i ai ma le loto fuatia ifo ua mamā...*” Le Auauunaga sa tulivae **TATALO** ai i le *ao ma le po*. O le malosiaga na to’o i ai lona sā, ma talosia ai le ‘auuso o pōpōfou i le **Galuega Tala’i**. Aemaise o Timoteo lona atalii i le faatuatua, na valaauina mo Efeso. Ua si’ilima nisi uso ma faase’etuāgalu, a e le’i lafoa’ia lona faamaoni.

Ua faamalosi mai so’o se avefeau o le Talalelei, e tataua ona tamaoiga i le ola **TATALO**; auā e lē fia tū poupu na o ia, a o faatau matatao ma fitā o le galuega molimau mo Iesu. Fai mai Paulo iā Timoteo; “*...ua ou manatua oe e lē aunoa i a’u faatoga i le po ma le ao.*” E leoleoina i tatalo, mafutaga a le Au Kerisiano ua feuluuluta’i ai le alofa. A’o lana

taulogologo foi lea i **Ekalesia Kerisiano i Asia Itiiti** na faatūtūina; “*...ia outou tatalo e lē aunoa.*”

A e ‘auga lava i afioga tuusa’o a IESU i Lona ausoo; “*Ia outou mata’ala ma tatalo, ne’i oo mai le faaososoga ia te outou.*” Lea lava e tauave i le anotusi o ana tūsiga faafaifeau. O le tusi ua sa’afi ai se pagota ua aiga ma le falepuipui, talu moliaga fai fa’amalosi i lona tala’i o le Suafa o Iesu. E noanoatia lona tino, a e avanoa pea lana faasoia fa’aleagaga i aiga ma uso o galulue i tofi faale-Atua. “*Timoteo, o lo’o o’u faanaunau e feiloai ma oe, auā ua ou manatu i ou loimata; ina ia tumu ai a’u i le olioli.*”

E lē galo tete’aga ma loto nutimomoia, auā e mamaē mafutaga e femulumulua’i i le alofa o le Atua. O le mitamitaga lea o le Aposetolo, e ui ina sili’ofe lana seuga; a o lea ua so’oula. O Timoteo, o le pine o lana **Galuega Faamisionare**. O lea pe ola pe oti, a e lē o noatia ai le fa’asalalauina o le Tala i le Keriso Toetu. A e faafetai foi ua mafai ona ia fa’a-auvaa le Galuega a le Atua i nisi latou te fa’aauuina. Ni toa magumagu e lē faamata’uina e puapuaga ma sauaga. E manatua ai upu tautino a se tasi ulua’i maturo o le Talalelei; (*Deitrich Bon Hoffer*); *Pe ā valaauina e Keriso se tasi, o lona fetalai mai lava lea; sau ia inā e oti.* (*When Christ calls a man, He bids him come and die*). O le a lona uiga?

E lē o ataata fasia o puapuaga ma le oti, o se taufaamata’u i tagata moni o le Alii. E mafua ai ona auuana ma *le loto fuatia ifo ua mamā*. E pei ona tautua lē faalogologo tigā tua’ā ua mavae. O le faasoia a PAULO ia Timoteo, o se tuualalo e sufi ai le ola finau ia lē faavaivai. Leaga o le galuega e lē toliniu fitifiti i ai se atamai. **Po’o ai foi se POLOFESA i lalo o le lā, e uma ana metotia e fofō ai ni faafitauli o tagata i le ulua’i tausaga; a e lē uma metotia a le aulotu e pu’e mai ai le faifeau ma lona toalua.** E tā ane le malologa ua leva ona lē fia i ai (*tautala ma le fa’aaloalo*).

A e tasi lea itu tāua ia manatua; *ia fai ma faaa’oa’o ē na muaimalae*. Ia manatunatu i matua ma faasinomaga na fanau mai ai lona ta’uaogāina. Amata iinā ona toe sasa’a le fafao. Ne’i galo ataata lafoia o faamanuiaga a matua, o lele ua ‘ula ai le asō. Fai mai lana tala i lona atalii faaleagaga, “*Ua ou manatua le faatuatua faamaoni ua ia te oe, sa mua’i i ai iā Loi o le tina o lou tina, atoa ma Eunike lou tina; o la’u taofi o loo ia te oe foi.*” Ana lē seanoa lenā faatuatua e lē pale Timoteo. Ua taoto mai tautua

---

molimau ola o a lā galuega ua tautalaaso. E manatua nai tinā na faafairoleina le olaga o Timoteo. O le lā tautua sailimalo lenā, sa vaavaalua ma **Lana Galuega Faamisionare**. O le fala na o latou lafo i luma, e saofafa'i ai tupulaga e fai mai o aiga ma le ekalesia. *Se ā la se galuega a Timoteo e tatau ona fai? “IA TOE FAAMUMŪ MEAALOFA A LE AGAGA.”* Ia taofiofi mamau i manuia na afua mai Mauga. Toe faasusulu le alofa o le Atua i lana Ekalesia. Ia maua le faapalepale i tagata lotu. Tausi le Galuega i le faamaoni ma le loto maulalo. A o le sini o nā mea uma, aua ne'i mapu le a'oa'oa atu o le Tusi Paia. O le Auala lea na fa'asavali ai Timoteo e **Loi ma Eunike** a'o tama meamea i le ola faaleagaga. Na a'oa'oina ai o ia e **uiga i le faatuatua**. O ala faa-vavega a le ATUA, na to'ala faa-autama ai tinā o le aiga; e faafairole feoi ia o le Talalelei.

E logo ā le tuli o le tātā; “...ia toe faamumū le meaalofa mai le Atua, o lo'o ia te oe lea i le faae'e atu o o'u lima.” O le 'Au'au lea o le anotusi. Ma e ese le tāua o le faaupuga, “*Ia toe faamumū...*” (rekindle). E faatusa i se **afi ua faasolo ina mate, a ua manaomia ona toe feula ia mumū atili**. Ia tafitafi ese ona lefulefu seia oo ina ola ma mūsaesae.

O lo'o faaogaina mai e le Aposetolo le upu **Eleni ā faamatalaina; 'o le afi o tolauapiga' (campfire)**. **E faamafanafana ai le 'autau o feagai ma osofa'iga i le tau malulu. Po o le ā le umi e tolauapi ai, e mafanafana pea ona o le afi lea. A e aogā foi lona pupula e malamalagia ai le fili i le pogisa.**

A'o le faatatau lea o apoapoa'iga a le Aposetolo, ia **toe faaolaola le olaga faale-Atua o Timoteo**. O lana amio ma ana upu e a'oa'oa atu e mafanafana ai le Ekalesia. O ana faatinoga ma lona vā fealoa'i i tagata lotu i le Ekalesia. “...o meaalofa na ui atu i le faae'eina o ona lima.” O le faau'uga mana a le Agaga e lē faapalapala ai e galue. Ua momoli atu e le **faae'egā lima**, se upu faamanuia a le **Faae'e Lima**. O le faamanatu iā Timoteo, e lē o se tofiga na mafua ona o ia; a'o le Atua na Ia filifilia le tagata.

Ua filifili ina ia faataunuu ai ana poloaiga; “**Aua ne'i 'ino'ino se tasi i lou taulealea, a ia fai oe ma faaa'oa'oa i ē ua faatuatua, i le upu, ma le amio, ma le alofa, ma le loto, ma le faatuatua, ma le**

**amio mamā. Ia e faasaga i le faitau atu o Tusi Paia, ma le apoapoa'i atu, ma le a'oa'oa atu, seia ou alu atu.**” Ā lea ua fua mai le **faae'egā lima**, ua fa'aaogāina lona ola talavou; e taitai ai loto o tagata i le Alii. E folafola atu ai **Meaalofa a le Agaga** i lona soifua ofoina atu. Ia atagia le Atua i ana taleni uma ua fa'aaogā e auauna ai mo Keriso ma le faamaoni.

#### FAATATAU:

Le Ekalesia pelē ma lau tapuaiga mamalu i lenei taeao, **talofa ua na o se alafa pupula iti so'u tulai atu e momoli 'au taulaga o le po**. Ua lē gafatia e so'u faatauvaa ona fa'aaainā lou soifua auauna i le Atua. Ma e lē fia fagota i le sao i aso faapenei. Ui i lea, ua ou mafanafana auā o le **Upu a le Alii** e fana i le tu'itu'i. **E ui e lē a'oaia ai e le matapia le manaia**, a ua na o se taulogologo atonu e aogā mo le tā Auaunaga i le Atua.

O **Meaalofa a le Agaga** e matalasi, e lē faoa le matagofie; auā ua faatufuga ai i tatou e le Atua. Ua faatumuina ai lo tatou gaogao. Pei lava ona a'oa'oa Paulo iā Korinito; “**E matalasi meaalofa, a e tasi lava le Agaga ia; e matalasi foi faiva, a e tasi lava le Alii ia...o Lē na te matuā galue i mea uma i tagata uma lava.**”

A e talofa i meaalofa ua faalēmumū, leaga ua tatou faatamala i le tausiga. Ua sosofa e Tū ma Aga ua fofotu mai faafuata; mea moni ua toilalo gofie ai tautai na fili i le tai mo aso loulouā. O lā le Aposetolo; “**Auā ua lē foa'iina mai e le Atua ia te i tatou le agaga e mata'u ai, a o le agaga e faamalosi ai, ma alofa ai, ma pulea ai o tatou loto.**” E mafai e tagata uma ona faamumū atili **Meaalofa a le Agaga**, pe afai tatou te maua le loto maulalo ma alolofa faamaoni i le Atua.

E toe fafagu mai i lo'u mafaufau, le lu'i a si o'u tamā faaleagaga sa a'otauina a'u mo Malua (**Susuga Toeaina ia ALIIMAU MANŪ**). Fai mai lana saunoaga; **'Atalii, a e tago e fai se galuega, fai o lau toe galue lenā e oti loa'** (**Son, if you do something, do it as if it is your last before you die**).

E lē tau faamumūina **Meaalofa a le Agaga**, pe afai e manatua pea le tāua na filifili ai i tatou e le Atua. Ne'i galo tausaga e tele sa a'otauina ai mo le

Galuega, fa'afailele e le Ekalesia; ae i'u ane ua tautua mo isi talitonuga. O le **Agaga o le Atua**, o le matagi na te toe feula ia saga olaola lā tatou magalafu faaleagaga; e gasese ma faasoa atu ai faalumaga o le Upu; auā le tausiga o le lafu mamoe.

O le natura o le afi e vave ā ona mate pe ā liligi i ai le suavai. O nisi taimi ā tau mumū ane **Meaalofa a le Agaga** i le Galuega, a e toe pē malie ifo ona ua masa'a i ai le 'ava malosi. O nai **Meaalofa a le Agaga** ua mumū manaia, a e toe faasolo ina tau pulapula; ona o le **tutu afi o mea nei o tagata lotu** (*pei o suaga o nei aso*). Faaleaga atu lea, muimui ane le faifeau ma lona toalua.

Le Au uso e, 'aua tatou te tineia **Meaalofa a le Agaga** i le tofi ma le tiute ua valaauina ai. Ia tatou faamaoni e faasusulu atu i lo outou soifua ma so'u ola valaauina. Afai ua mū itiiti, toe tapu'e i le **Tatalo** e pei ona faia e **PAULO mo Timoteo**; po o le **poloaiaga a Iesu i lona ausoo**.

E fesoasoani foi le Toe Faamumūina o ia meaalofa, i lo tatou galulue femulumulua'i e faamalosi'au le tasi i le isi. Faasoa ma fetufaa'i i le Alofa o le Atua, e pei o le Autū o lenei Fonotele; "**TUMAULE ALOFA O LE TASI I LE ISI.**" A e lē seiloga o le tufaga o **Tusi Lūlū** faato'ā tatou faamasani.

#### KERUGMA:

O Iesu Keriso lava Ia na fetalai; "**O outou, o le malamalama o le lalolagi outou. E lē mafai ona lilo le aai ua tū i luga o le mauga. Latou te lē tutuina foi le moli i le tu'u ai i lalo o le mea e fua a'i saito, ae tu'u i luga lava o le tuugamoli ia pupula atu ai i ē o i le fale uma.**"

O Ia lava le Malamalama o le lalolagi, na aveesea lo tatou pogisa e ala i Lona Malia ma Lona Toetu Manumalo. Ua liligi ifo foi Lana Meaalofa o le Agaga Paia, o le Fesoasoani Sili i le TOE FAAMUMŪINA O IA MEAALOFA. Ona o Iesu... **AMENE!**

**Saunia: Susuga Kirisimasi Sani FS,  
EFKS Ululoloa ma Siusega,  
Matagaluega FALEATA**

(O le Lauga o le Lotu a le Au Leoleo o le Fono Tele 2022, na faia i le 5.00 i le taeao o le Aso Faraile, 23 Setema. Ua lomua faatasi ma le Faafetai tele a le susuga i le Failauga i le Laulau o le Fono Tele, ona o le avanoa ma tofiga, na te ta'ita'iina ai lea Sauniga Lotu a le Ekalesia.)

## O LE ALII I LONA NOFOA

**“O le Alii o i lona malumalu paia o Ia; o le Alii o loo i le lagi Lona nofoalii.” Salamo 11.**

Na fesili le fai Salamo, “<sup>3</sup>Auā ua fulisia faavae, se a se mea e mafai ai le tagata amiotonu ona fai?” Ona ia tali lea o lana lava fesili: O loo afio le Alii i Lona nofoalii i le lagi. Pe afai e lutia i puapuagā, e faata'otolia i ma'i ogaoga, pe afai ua tutupu maseiga ma malepelepe le aiga, ua fetai'a i fanau ma faafitauli, ua tuulafoa'iina ma lē amanaiaina e tagata, pe afai foi ua ufitia i le ao pogisā ona o le malaga a le maliu ma le oti, o le a se mea e te fai? Ia e manatua o loo afio pea lava le Atua i Lona nofoalii, ma o loo Ia silasila mai ia te oe. E leai sina iota e lilo i Lana silafaga ma Lana leoleoga malu mo oe ma i tatou uma. E galue o Ia e tusa ma Lana fuafuaga ua faataatia, ma o ni fuafuaga e tele ina tatou lē malamalama ai pe afai tatou te uia ala faigata. Se'i vaganā ina ua tatou toe vaai i tua, ona tatou iloa lea, e moni lava o Lona alofa ma Lona agalelei sa mulimuli mai ia te i tatou i aso uma o lo tatou ola (Salamo 23:6).

Na oo Iosefa i le falepuipui. E fa sefulu tausaga sa faamaumau e Mose i le vao ma le toafa. O Tanielu na fa'aaunu'ua. O taimi tiga ma faigata nei mo ia tagata. Pe se ā se mea lelei e mafai ona tupu mai ai i nei taimi leaga? A o ai se na iloa, o le i ai o Iosefa i le falepuipui ua na o se sitepu e laa atu ai o ia e avea ma palemia o le malo Aikupito? O ai se na manatu, o loo tapena ma koloni e le Atua ia Mose i le fasefulu tausaga i totonu o le vao lea e tasi, o le a ia taitaiina mai ai le fanauga a Isaraelu i ni aso o muamua? A o ai na mafaufau o le a avea le Tanielu na pu'e ma saisai, e fai ma faufautua sili a le tupu?

E faapena ona faagaioi fuafuaga a le Atua. Na Ia faia mo Iosefa, Mose, Tanielu ma le toatele o isi tagata – na te faia foi faapea mo oe ma tatou uma e faatutua i le Atua – o lea ia talitonu ia te Ia, o nofo i Lona nofoalii i le Lagi. Na te foai atu ia te oe le alofa tunoa e lava ma totoe ina ia e manumalo ma gafatia ai tulaga faigata ua i ai nei. Pe afai e te fesili, “Le Atua e, o fea ea oe?” O Lana tali, “<sup>15</sup>Faauta foi, ou te i ai ia te oe, ou te tausi foi ia te oe i mea uma e te alu i ai, ou te toe faafoisia mai oe i le nuu nei; auā ou te lē tuua oe, seia ou faia le mea ua ou fai atu ai ia te oe.” Kene.28. O loo afio, o loo pule ma leoleo le Alii, mai Lona nofoa i le Lagi.

---

# **O E UA FAI I LAGI LE FOLAUGA**

## **TAUILIILI TUMUAFAA- ETEMANŪ TUVALE ULUILELATA (TT)**

**(30/4/1946 - 5/5/2021 (75+0+6))**

O le afioga i le Tiakono Toeaina o le Matagaluega Niu Sila i Saute. Na soifua mai le afioga ia Tauiliili Tumuafaaetemanu Tuvale Uluilalata i le Aso Lua, 30 Aperila 1946. Na faamanavaina e le Atua ana galuega i le Aso Lulu, 5 Me 2021 i le maota gasegase i Ueligitone Niu Sila, ma ua atoa ai le 75 tausaga ma aso e 6 o lona soifua. E valaau le Matai i Lana auauna o galulue le afioga Tauiliili ma le faletua ia Sera i le tofi Tiakono Toeaina o le Matagaluega Niu Sila Saute. Ua sili atu ma le 40 tausaga o galulue i la'ua i le tofi Tiakono i le EFKS Ketesemane i Porirua, Pulega Ueligitone Matu, i le Matagaluega a Niu Sila i Saute.

O se auauna tausaaafia, tauivi ma finau mo le manuia o le Ekalesia. Sa avea ma Komiti A'oga a le Matagaluega Niu Sila Saute i tausaga 1996 - 1999. Sa galue foi i le tofi Teutupe Fesoasoani a le Matagaluega Niu Sila Saute i tausaga 2011 - 2014, ma o se sui foi o le Komiti Tupe a le Ekalesia Aoa. O le afioga Tauiliili o se meaalofa lava a le Atua mo le Ekalesia, e le gata i si ana Aulotu e pele ia te ia, le EFKS Ketesemane i Porirua, a e faapea foi i le Ekalesia Faapotopotoga Kerisiano Aoa.

E toa tolu o la alo ma fanau a fanau o loo soifua ma le faletua ia Sera Uluilalata. O se fiafiaga ia te ia nai ona alo aemaise o la alo o loo galulue i le galuega paia a le Atua, le faletua ia Phillipa ma le susuga i le Toeaina ia Posala Tioa FT. O se tamā loto alofa ma faamaoni i lona valaauina.

O lona sauniga faaleaiga, sa ou ta'ita'i. O le susuga Failautusi o le Pulega Ueligitone Matu, susuga Meki Lauvi FS na saunia talosaga. O le susuga i le Teutupe o le Pulega, susuga Faafetai Milo FS na saunia le Upu faamafanafana. Sa molimau fanau, fanau a fanau, fanau a fanau a ana fanau, o aiga, o uso ma tuafafine, o sui o le Matagaluega, ma sui o le Aulotu i Ketesemane. O lona sauniga faamavae, sa faia i le Aso Lulu, 12 Me 2021; na ta'ita'i le Toeaina susuga

Aufaga Faafia FT. O le Toeaina susuga Faatulituli Setu FT na saunia le Upu faamafanafana. Sa molimau le faletua ia Sera Uluilalata i le la mafutaga ma le tamā, a o a'u sa molimau i lona soifua faaleagaga. Ona faai'u ai lea o lona toe sauniga i lona oliolisaga tumau i Whenua Tapu, ma faamavae atu ai i le Pese Faamavae a le au kerisiano, 'Talofa uso e, tofaina oe' Tauiliili Tumuafaaetemanu Tuvale Uluilalata. "Le auauna lelei e, ma le faamaoni, na e faamaoni i nai mea iti, ou te tofia oe e pule i mea e tele; ina ulufale mai ia i le fiafia o lou Alii." (Mataio 25:23). Ia manuia lau malaga Tauiliili Tumuafaaetemanu Tuvale Uluilalata TT.

***Saunia: Susuga Kuatemane Ulutui FS,  
EFKS Ketesemane,  
Matagaluega LAUMUA O AOTEAROA.***

## **FAITALA FILIPAINA**

**11/12/1955 – 29/8/2019 (63+8+19)**

O le faletua o le tiakono ia Faitala Filipaina na soifua mai i le Aso Sa, 11 Tesema 1955 i Faleāseelā i Lefaga. Na maliu i le Aso Tofi, 29 Aokuso 2019 i le maota gasegase i Ueligitone. Sa faaipoipo atu i le tiakono ia Vai Filipaina, ma e toatolu o la'ua alo o loo soifua pea. Sa a'oa'oina Faitala i le Kolisi Papauta. O se tina tauivi ma finau, e iloga lona naunau ia manuia le aiga aemaise le galuega a le Atua. O se tina e lē mana'o e faaletonu se mea, e naunau i le matagofie ma ta'uleleia mea uma. E loto alofa ma faamaoni i lo la tofi tiakono ma lona alii.

Sa ou ta'ita'i i lona sauniga faaleaiga, o le susuga i le Toeaina ia Aufaga Faafia FT sa saunia talosaga, o le susuga Nove Vilaau FS na saunia le Upu faamafanafana. Sa molimau le fanau, uso, tuagane, aiga, uo ma e masani. O lona sauniga faamavae, sa ta'ita'i le Toeaina susuga Aufaga Faafia FT ma saunia le Upu faamafanafana, a o le susuga Nove Vilaau FS sa saunia talosaga. Sa molimau le tamā ia Vui Filipaina i le la mafutaga ma le tina. Sa ou molimau i lona soifua auauna i le galuega a le Atua.

O ona toe sauniga i le tuugamau sa ou ta'ita'i ma faamavae atu ai i le pese a le au kerisiano, 'Tofa,

tofaina oe Faitala Filipaina. Ia manuia lau malaga.  
“Le auauna lelei e, ma le faamaoni, ulufale mai  
ia i le fiafia o lou Alii.”

**Saunia: Susuga Kuatemanu Ulutui FS,  
EFKS Ketesemane,  
Matagaluega LAUMUA O AOTEAROA.**

**ESAU FEVAEA’IAH-MU**  
**(30/5/1947 – 8/10/2019 (72+4+9))**

O le susuga i le Tiakono ia Esau Fevaea’i Ah-Mu, na soifua mai i lona aiga i Nofolani i le Aso Faraile, 30 Me 1947, a e na malii i le falema’i i Ueligitone Niu Sila i le Aso Lua, 8 Oketopa 2019. Ua 72 tausaga, 4 masina ma aso e 9 le matua o lona soifua. O Esau ua sili atu i le 30 tausaga o avea ma tiakono ma si ona faletua o Saumalu Ah-Mu. O se auauna agamalū, filemu, e faamaoni i lona valaauina. O se tiakono e fiafia i sauniga lotu, Potopotoga ma Tofiga faa-Pulega. E lē lagona sona leo a e leo tele ana galuega.

Sa ou ta’ita’i i lona sauniga faale’aiga. Sa molimau lana aufaigaluega, o uso ma tuafafine ma ona aiga. O talosaga sa molia e le Toeaina Susuga Aufaga Faafia FT, a o le Susuga Nove Vailaau FS sa saunia le Upu faamafanafana. O lona sauniga faamavae sa taitai le Susuga Toeaina ia Aufaga Faafia FT, o le Susuga Nove Vailaau FS sa saunia talosaga. Sa molimau le faletua ia Saumalu Ah-Mu i la la’ua mafutaga; na molimau foi le Toeaina susuga Ailepata Leuta FT e tusa ma le mafutaga ma le uso. O a’u sa molimauina lona soifua faaleagaga.

Na faai’u i Whenua Tapu lona sauniga i lona oliolisaga tumau, ma faamavae atu ai i le lagiina o le Pese Faamavae a le au kerisiano, ‘Talofa, uso e, tofaina oe.’ Tofa Esau Fevaea’i Ah-Mu. Ia manuia lau malaga. “Le auauna lelei e, ma le faamaoni, ulufale mai ia i le fiafia o lou Alii.”

**Saunia: Susuga Kuatemanu Ulutui FS,  
EFKS Ketesemane,  
Matagaluega LAUMUA O AOTEAROA.**

**TUPUIVAO LAVE MAUGĀ**  
**(1/10/1951 - 11/1/2021 (69+3+11))**


O le afioga i le tiakono ia Tupuivao Lave Maugā na soifua mai i le Aso Gafua, 1 Oketopa 1951 i lona nuu o Lalomalava, Savaii. Na faamanava e le Atua ana feau i le Aso Gafua, 11 Ianuari 2021 ina ua atoa le 69 tausaga, 3 masina ma aso e 11 o lona soifua, a o galue o le tiakono i le Ekalesia Ketesemane, Porirua Niu Sila. O le susuga i le tiakono ia Tupuivao e toatolu ona alo, ua fai i lagi le folauga a le tina i nai tausaga ua mavae. O se tiakono sa auauna ma tautua lelei i le Lotu. O se auauna e agamalu ma loto maualalo, ma e tausafia ona uiga i totonu o le Ekalesia. O se tiakono faamoemoeina ma faatuatuaaina, aemaise lona galue malosi mo le atina’eina o le Ekalesia i soo se itu. Talofa e, ua maliliu toa, ua maumau ai auupega o le taua!

O lona sauniga faale’aiga, sa ou ta’ita’i. O le Toeaina susuga Aufaga Faafia FT na saunia talosaga. O le susuga Nove Vailaau FS sa saunia le Upu faamafanafana. Sa auai uma aufaipese a le faletolu i le lagiina o viiga o le Atua - aufaipese EFKS Porirua, EFKS Cannons Greek ma le EFKS Ketesemane. Sa molimau le fanau, aiga, uso, uo ma aumea mamae. O lona sauniga faamavae sa ta’ita’i le toeaina susuga Aufaga Faafia FT, o le susuga Nove Vailaau FS sa saunia talosaga. Sa ou molimau i lona soifua faaleagaga faapea foi ona molimau si ona uso, le susuga i le A’oa’o ia Tuilaepa Mata’utia Malofou Maugā, i le mafutaga ma le soifua auauna o le uso i le aiga, le nuu ma le Ekalesia.

Sa ou ta’ita’iina lona sauniga faamavae i lona oliolisaga tumau, ma faamavae atu ai i le Pese Faamavae a le au kerisiano, ‘Talofa uso e, tofaina oe.’ Tofaina oe Tupuivao Lave Maugā. ‘Amuia lea auauna o loo maua mai e lona Matai, a e o loo faapea ona ia fai.’ ‘Le auauna lelei e, ma le faamaoni, ulufale mai ia i le fiafia o lou Alii. Ia manuia lau malaga Tupuivao Lave Maugā.

**Saunia: Susuga Kuatemanu Ulutui FS,  
EFKS Ketesemane,  
Matagaluega LAUMUA O AOTEAROA.**

**TAUILILI T. T. ULUILELATA**



**FAITALA FILIPAINA**



**ESAU FEVAEA'I AH-MU**



**TUPUIVAO LAVE MAUGĀ**



**TA'ITA'I LOTU AU LEOLEO & AUFAlPESE EFKS ULULOLOA & SIUSEGA**